

Puisi

A. Wahab Ali

PERJALANAN SI TUA

Menoleh ke belakang
Dunia mengejanya
Nostalgia menjadi sungai air mata

Menunggu kini
Menjadi mainan sepi

Menuju ke hadapan
Lapangan sunyi sendirian
Tidak bertepi.

*19 Januari 2017
Kampung Tunku, P.J*

HIDUNG

Bila kita sedang bertenaga dan sedang berusaha
Hidung kita selalu mendongak
Kerana mata kerap memandang tempat tinggi
Takhta kejayaan yang bermain dalam mimpi
Untuk diduduki.

Ketika usia melanjut dan banyak bahagian anggota mengecut
Hidup kita lisut menunduk ke tanah
Kerana kita tahu hidung yang mendongak
Tidak mencium bau jannah.

*29 Januari 2017
Kampung Tunku, P.J*

PERJALANAN TERAKHIR

Perjalanan ini
Seorang diri
Amat sepi
Tidak bertepi.

Selamat tinggal dunia
Kampung sementara
Kukumpul bekal
Kini kubawa.

Orang telah lama
Dan ramai ke sana
Tidak pernah kembali
Ke sini
Untuk kutanya.

Hanya khabar Allah
Tak pernah
Bersua wajah
Suluh
Menuju arah.

Perjalanan ini
Amat sayu dan ngeri
Bagaimanapun
Aku tetap bertolak pergi.

*13 April 2015
Kampung Tunku, P.J*

USIA

Hidup ini seperti setitis embun
Melekat sebentar di daun dunia
Dan pergi mengering tidak berbekas lagi.

*29 Oktober 2016
Kampung Tunku, P.J*

Biodata Penulis:**A.Wahab Ali**

Penulis merupakan penerima Anugerah S.E.A Write (1994). Kelahiran Kampung Sungai Kembong, Bangi, Selangor, pada 2 Mac 1941. Ijazah Doktor Falsafahnya dalam bidang pengajian Melayu dan Indonesia (1971) dari Australian National University. Pernah menduduki Kursi Pengajian Melayu di Universiti Leiden dan Sarjana Tamu di Institut Alam dan Tamadun Melayu, Universiti Kebangsaan Malaysia. Antara karyanya adalah novel *Angin Hitam* (1968), *Pemburu* (1968), kumpulan puisi *Penemuan* (1975) dan *Sajak Orang Berdosa* (1977). Sementara antara penulisan ilmiahnya dalam *Kesusasteraan Melayu dalam Bandingan dan Pendidikan* (2009) dan *Kemunculan Novel dalam Sastera Moden Indonesia dan Malaysia: Satu Kajian Bandingan* (2012; terjemahan daripada *The Emergence of the Novel in Modern Indonesian and Malaysian*, 1991).